

EDITORIAL

Mag-andam ha masunod nga takna han kagiusan protesta kontra ha korapsyon ngan pasismo han rehimen Marcos

Sumobra-kumulang tulo kabulan an kaihaon han naglabay nga syahan nga takna han kagiusan protesta kontra ha korapsyon ngan burukrata kapitalismo. Syahan ini nga binuto hadton Septyembre, ngan nahi-ngadto ha nasyunal nga koordinado nga demonstrasyon hini nga naglabay nga Nobyembre 30. Kada semana giutan hini mayda mga *walkout* ngan demonstrasyon han mga estudyante ha mga unibersidad tikang ha norte han Luzon tubtub ha mga syudad han Kabisayaan ngan Mindanao. Ha magkalain-lain nga komunidad, bungto, pabrika, upisina ngan mga singbahan, nagralli ngan nagmartsa an magkalain-lain nga sektor nga ginbutok han komun nga kangalas ha korapsyon ngan dunot nga sistema.

Nagtikang ha iskandalo han bil-yun-bilyon kapiso nga kikkak ha mga maanomaliya nga *flood control projects*. Waray pag-iha, nabuksas an iba pa nga pareho kamagraut nga porma han korapsyon ha gub-yerno. Nabuksas an maanomaliya nga "farm-to-market road" ngan dirudilain nga ginpatindog nga mga imprastruktura. Nabuksas liwat an gatus-gatos kabilyon nga piso nga mga "alokabol" ha nasyunal nga badyet, ngan iligal nga paggamit ni Marcos ha pondo han PhilHealth.

Nagtikang ha panawagan nga "tanang dabi, kinahanglan magpagabaton" ngan pagsukna ha mga upi-syal han Department of Public Works and Highways (DPWH) ngan mga kakunsabo nga kontraktor, kongres-man ngan mga senador. Waray pag-iha, guliat han kabatan-unan ngan han magkalain-lain nga sektor, "Marcos, Duterte patalisikon!," kahuman mabuksas nga

hi Marcos mismo an Hadi han Mandambong nga aada ha bawbaw han baga-bukid nga kawat nga kari-kuhan, ngan hi Sara Duterte an Reyna han Korapsyon nga nagmal-gastar han gatus-gatos kamilyon nga pondo han katawhan. Eruestorya yana an pagtukod han nasyunal nga konseho nga pantransisyon, agud ig-insister an interes han mga demokratiko nga sektor ha bisan ano nga igsasaliwan nga gubyerno.

An pagbaha han protesta ti-kang Septyembre mahitatanding ha makasaysayan nga mga pagrabunos han protesta ha nasud. Ha naglabay nga mga dekada, pira kabeses nga binuto an gamhanan nga mga kagiusan han katawhan, nga duha kabeses nakagpabagsak ha naka-lingkod nga presidente (Marcos hadton 1986 ngan Estrada hadton 2001). Dugang dinhi an patriyotiko nga pag-aalsa han mga kabatan-unan hadton First Quarter Storm hadton 1970, mga welga han katawhan hadton 1989-1990, mga rali kontra ha korap ngan pasista nga rehimen Arroyo ngan hiluagan nga demonstrasyon kontra ha *pork barrel* hadton 2013-2014.

Espiho han hiluag ngan hilarum nga kangalas han katawhan an pagbuto han kagiusan protesta. An



paspas nga pagsalwak hini pangilalan han nakaladkad nga kangalas han katawhan ha waray wantas nga paghitaas han presyo, pagraysang han suhol ngan pankabug-usan nga pagbagsak han ira pakabuhi, ha ilarum pa ni Duterte ngan labina han liningkod hi Marcos. Mas naglarab an kangalas han katawhan ha atubangan han hiluagan nga destroso tikang Cebu tubtub Palawan nga dara han bagyo ngan mga dunot nga proyekto nga *flood control*. An pagbursa ha bilyun-bilyon kapiso nga kwarta han katawhan nagsungo ha diri nawawara nga kangalas han katawhan ha kawatan nga pamilya Marcos.

Naludlod ha hilarum nga pam-pulitika nga krisis an rehimen Marcos tungod ha pagrumpagas han mga gios-protesta. Mas nabay-og ini han mabuksas nga kumarawat mismo hi Marcos han diri mamenos ha ₱25 kabilyon nga kikbak o "SOP" kabalyo han mga proyekto nga pan-imprastruktura nga ginmando niya nga igsulod ha badyet. Ha larang nga tahuban hi Marcos, pira nga higtaas niya nga upisyal an ginsak-ripisyo ngan ginpabul-iw. Kaupod ha ira an pinuno han gabinete nga ginngaranan nga dabi ha anomaliya.

Ginbug-os ni Marcos an "independyente nga komisyon" para kunuhay mag-imbestiga ha mga ano-

maliya, kundi para la igtago an papel han Malacañang ha korapsyon. Agud magpadasig ngan pakalmahon ngan igpahirayo ha iya an kangalas han katawhan, ginduduso yana ni Marcos nga kasuhan ngan arestuhon an pira nga dako nga kontraktor ngan kilalado nga mga pulitiko.

Napostura nga kontra-korapsyon hi Marcos subay ha sagdon han imperyalista nga amo agud tanggalan han hangin an kagiusan protesta kontra korapsyon. Kabakyang niya an pira nga lider han Akbayan nga todo an paningkamot nga igsimang an kagiusan kontra-korapsyon tikang ha pagpapabaton kan Marcos ngan tahuban an panawagan para ha iya pagbubul-iw. Ha sagdon pa gihapon han US, ginmando ni Marcos an utro nga pagpahitaas han sweldo han mga sundalo ngan pulis, ha tuyo nga igkonsolida an iya kontrol ha AFP ngan PNP, ngan mas mahugot nga magamit ini ha brutal nga todo-gerra kontra ha masa nga parag-uma ha kabaryuhan ngan pagpupoy ha namamangpangan pa nga paghiluag han mga protesta han katawhan ha tiarabot nga panahon.

Kahuman dirudiretso nga umabante tikang Septyembre, aada yana ha takna han konsolidasyon an kagiusan protesta kontra ha korapsyon ngan burukrata kapitalismo—

han pagpapakusog ngan pag-aandam para ha utro nga pagbuylo. Ayat ha mga pwersa nga nasyunal-demokratiko nga aada ha unhan nga ranggo han kagiusan protesta nga magsuma ngan pumurot han mga leksyon tikang ha naglabay nga tulo kabulan. Ayat nga padig-unon ngan pahiluagon an ira mga asosasyon, mas pahilaparon an ira mga alyansa ngan padig-unon an panindugan ngan determinasyon nga atuhan an korapsyon han rehimen US-Marcos.

Ayat ha ira nga dirudiretso nga mag-andam ha masunod nga takna pinaagi han pag-abot ngan pagorganisa ha mas damo nga pabrika, kabras nga komunidad, eskoylahan ngan iba pa nga sentro han populasyon ha bug-os nga nasud, ngan padamuon an mga aksyon protesta han masa ha ira mga lokalidad. Ayat nga pahilarumon an pagsantop ha burukrata-kapitalismo, ha magkalain-lain nga porma hini, ngan ha mga gamot han problema han pagkukuri han katawhan. Pira kabeses nga pahiluagon an alyansa nga kontra-korapsyon ngan pahug-ton an pagkaurusa kontra ha paghahadi han mga Marcos ngan Duterte. Ayat liwat nga ibuksas an mga peke nga progresibo nga lider ngan mga ultra-konserbatibo agud makabig an masa nga kontra korapsyon nga nauuwat ngan ginwawaog nira ha sayop nga dalan han panginyupo ha hadi han korapsyon.

Ayat ha Partido ngan mga rebolusunaryo nga pwersa nga magpakusog ha butnga han nagpapadayon nga hiluagan nga kagiusan nga kontra-korapasyon han katawhan ngan pag-ato ha pasismo han rehimen US-Marcos. Mas pahiluagon an sikreto nga mga panmasa nga asosasyon agud dirudiretso nga pukawon ngan aghaton an hiluagan nga masa han katawhan nga ipasulong an demokratiko nga rebolusyon han katawhan komo tinuod nga solusyon ha krisis. Atubangan han sobra nga kangalas ha nagnanana nga kadunungan han bug-os nga reaksyunaryon nga estado, maupay gud yana an sitwasyon para magrekrut para ha Bagong Hukbong Bayan ngan ipasulong an gerra han katawhan ha kabaryuhan.



Bolyum LVI Ihap 23 | Disyembre 7, 2025

Igin-gagawas an Ang Bayan ha lenggwahe nga Pilipino, Bisaya, Iloko, Hiligaynon, Winaray ngan Ingles.

Nakarawat an Ang Bayan han mga kontribusyon ha porma han mga artikulo ngan balita. Gin-aaghat liwat an mga mambarasa nga magpaabot hin mga suson ngan rekomendasyon ha ikauuswag han aton mantalaan.

An Ang Bayan igin-gagawas duha kabeses kada bulan han Komite Sentral han Partido Komunista ng Pilipinas

 ang.bayan@cpp.ph

Gin-uunod

Editoryal: Mag-andam ha masunod nga takna han kagiusan protesta kontra ha korapsyon ngan pasismo han rehimen Marcos 1

Yukut-yukot, utro nga tinindog kontra korapsyon 3

Diri nahunong nga mga paggios 3

Butaray nga pandambong ni Marcos 4

Nagpapakusog an KM para ha DRB 5

Edukasyon para ha komunista nga pagremolde 6

Pasismo ha pusod han mga nasud nga imperyalista 7

Ha dagmit nga pulong 8

4 nga sundalo, napatay ha mga engkwentro 9

Militar nga paghahadi ha isla han Samar, Kalinga 9

Mga protesta 9

Pagawason an mga alibangbang! 10

Yukut-yukot nga Pilipino, utro nga tinindog kontra korapsyon

Utro nga nagmartsa ha kakalsadahan hadton Nobyembre 30 an yukut-yukot nga Pilipino ha dirudilain nga parte han nasud para magprotesta kontra ha nabubuksas nga hiluagan nga korapsyon ha gubyrno. Kadungan ini han pagsalin-urog ha ika-162 nga kaadlawan han amay han rebolusyon Pilipino nga hi Andres Bonifacio.

Hito nga adlaw, nag-aningal an mga panawagan han katawhan ti-kang ha pagpapabaton ha tanan nga dabi ha anomaliya, pagbungkag ha mga dinastiya ha pulitika, ngan pag-papabul-iw ha poder ha presidente nga hi Ferdinand Marcos Jr, bise presidente nga hi Sara Duterte, ngan iba pa nga korap nga upisyal.

Ha pangunguna han Kilusang Bayan Kontra Kurakot (KBKK), masobra 20,000 an nagtirok ha Luneta Park ha Manila para ha protesta nga Baha sa Luneta 2.0. Nag-aten-tar an rehimen Marcos nga igdiska-ril an paggios ha pagdidiri ha ira nga makapagtirok ngan makapag-lansar han programa. Waray ma-pugngan han pananabotahe an guli-at han katawhan para ha baratunon ngan hustisya.

Tinambong ha paggios an mag-kalain-lain nga mga grupo, pwersa ngan sektor kaupod an mga traba-hador, parag-uma, kabras ha syu-dad, estudyante, kababayin-an, ngan tawo ha singbahan. Sugad han una nga gindeklara han KBKK, abri-do hini nga ginkarawat an magkala-in-lain nga mga panawagan han mga grupo kalakip an pagpapabul-iw kanda Marcos ngan Duterte ngan pagtutukod han usa nga *transition council*.

Yukut-yukot liwat an nagtirok ha protesta nga Trillion Peso March 2.0 nga ginhimo ha EDSA ha Quezon City. Ginpangunahaan ini han Si-ngahan Katoliko ngan iba pa nga mga grupo ngan partido nga nagko-komponer ha Trillion Peso March Movement (TPMM).

Antes an mga paggios, naning-kamot kundi napakyas an KBKK nga makig-usa ha TPMM para ha usa gud la nga protesta ha Metro Mani-la. Waray pagtugot an mga grupo ha TPMM, partikular na an Akba-yan, nga butaray nga dad-on han

mga grupo nga nakapailarum ha KBKK an mga panawagan nga butaray nga nagduduon kan Marcos ha pag-kakadabi ha sistemiko nga korapsyon.

Ha gawas han Metro Manila, gi-nios an mga grupo nga alyado han KBKK ha Baguio City, La Union, Ilocos Sur, Ilocos Norte, Isabela, Tar-lac, Calamba City, Cavite, Oriental Mindoro, Legazpi City, Naga City, An-tique, Capiz, Aklan, Iloilo City, Baco-lod City, Cebu City, Tacloban City, Davao City, Cagayan de Oro City ngan ha General Santos City. Nahireport liwat an mga misa, katitirok ngan martsa han mga kapadian ngan lider han singbahan, kaupod an katawhan, ha diri mamenos ha 86 nga di-yosis ha bug-os nga nasud.

Ha gawas han Pilipinas, inabot ha haros 2,000 nga Pilipino nga mig-rante ngan mga alyado ha 30 nga syudad ha 23 nga nasud an pinarti-sipar ha pankalibutan nga paggios kontra korapsyon. Ginpangunahan an mga protesta han nabug-os pa la nga KBKK-Global.

Step down kontra step up

Mas linandaw an pagkakaiba han panawagan han mga grupo ka-sumpay han pagpapabaton kan Marcos mismo. Diniri an Akbayan, usa ha mga nangunguna ha TPMM, nga kilal-on an kagrabihon han ko-rapsyon ni Marcos ngan lugod na-nawagan pa ini nga mag-"step-up" hiya ha pag-ato ha korapsyon. Suk-wahi gud ini ha panindugan han KBKK nga dako an baratunon ni Marcos ha sistemiko nga anomaliya ha gubyrno.

Nanawagan liwat an Akbayan kan Marcos nga himuon nga prayo-ridad an "anti-dynasty bill," bisan kun an pamilya hini an pinakamara-ut nga dinastiya ha pulitika.

"Step down" (lusad ka na) an panawagan han Bagong Alyansang

Diri nahunong nga mga paggios

ANTES NGAN KAHUMAN han Nobyembre 30, dirudiretso an paglalansar han KBKK han mga Black Friday Protest ngan iba nga paggios.

Landaw hadton Nob-yembre 21 an nasyunal nga *walkout* han Youth Rage Aga-inst Corruption. Nagmartsa an 1,500 nga kabatan-unan ha Mendiola hito nga adlaw. Pagkabuwas, magkabulag nga aktibidad an ginlansar han Se-niors Kontra Kurakot ngan han mga siklista komo protesta.

Hadton Nobyembre 28, usa nga nasyunal nga *sit-down strike* ngan protesta an ginpangunahan han Alliance of Concerned Teachers-Phi-lippines. Nakig-usa ha aktibi-dad an mga magturutdo ha masobra 400 nga pampubliko nga eskoylahan ha 14 nga re-hiyon ha nasud.

Makabayan (Bayan, kaparte han KBKK) kan Marcos. Ini agud tagan-dalan an usa nga libre ngan tipatip nga imbestigasyon kontra ha korap-syon, ngan atubangon an baratunon ha iya mga krimen kontra ha katawhan Pilipino.

Kahuman han protesta han KBKK ha Luneta Park, ginpamunuan han Bayan an martsa tipakadto ha Men-diola agud sukton hi Marcos. Ginpa-nawagan han grupo an pagbubul-iw nira Marcos ngan Duterte. Panawa-gan nira nga saliwnan hira han usa nga *national transition council*. Su-gad ha nakalabay, gin-ulang hira han yukut-yukot nga pulis ngan naduso na nga magprograma ha atubangan han University of the East ha Recto Avenue. Nakimartsa ha Bayan an mga pwersa han Partido Lakas ng Masa, Bukluran ng Manggagawang Pilipino ngan Sanlakas.

Ha paghuman han programa ha Recto Avenue, ginruba han mga rali-yista an *effigy* ni Marcos nga may sul-ot nga korona ngan *sash* nga may nakapinta nga bandera han US. AB

Butaray nga pandambong ni Marcos ha baul han katawhan

Diri malilikaw nga hi Ferdinand Marcos Jr an utok ngan pinakadako nga buwaya nga kinahanglan papagbatunon ha hiluagan nga korapsyon ha gubyrno. Ha nakalabay nga haros tulo kabulan, dirudiretso nga nabuksas an mga anomaliya nga direkta niya nga ginkakadabihan, han iya pamilya ngan pinakasuok nga mga upisyal. Aada ha peligro han kamatayon an ICI, an gintukod niya nga komisyon para pakalmahon an kangalas ha korapsyon ngan limpyuhon an iya ngaran.

Kabakyang an iya mga upisyal ha mga departamento ngan kakunsabo ha kongreso ngan senado, ginbalik niya an sistema han *pork barrel fund* ha porma han mga "allocable." Naghakin hiya han bilyun-bilyon nga kalugaringon nga *pork barrel* ha porma han *confidential and intelligence funds*, ngan pondo para ha *unprogrammed appropriations* (UA). Naatubang hiya ha mga anomaliya nga poyde magin basaranan para hiya ig-impeach.

Paggamit han UA ha flood control

Hadin Disyembre, ginbuksas ni hadto anay Justice Antonio Carpio han Korte Suprema an ebidensya han sumpayan han pagbalhin han pondo nga Philhealth ngan mga maanomaliya nga proyekto nga *flood control*. Hadton 2024, nagin kaparte han UA ni Marcos an ₱60 kabilyon nga pondo han PhilHealth nga "ginbalik" ha gubyrno. Labot dinhi, ginbalhin liwat ha UA an ₱170 kabilyon nga kita han Philippine Deposit Insurance Corporation (PDIC). Gin-gamit ni Marcos ini nga UA agud pondohan an palpak ngan *ghost* nga mga proyekto nga *flood control* (₱170 kabilyon) ngan iba pa sugad han Davao Bypass Road Project.

Sigon kan Carpio, talapas ha konstitusyon an ginhimo nga pagbalhin han pondo ha UA ni Ralph Recto, hadto anay sekretaryo ha pinansya ngan yana *executive secretary* ni Marcos.

Nagdesisyon diri pala maiha an Korte Suprema nga iligal an pagbalhin ngan ginpapabalik an pondo ha PhilHealth.

Kikbak, ismagling ngan manipulasyon han presyo

Tikang Nobyembre 14, pito nga

bidyo an gin-gawas ni Elizalde Co, hadto anay representante han Ako Bicol Partylist ngan pinuno han komite ha badyet ha Kongreso, nga nagbuksas ha korapsyon han pamilya Marcos. Ha syahan nga tulo nga bidyo, ginbuksas ni Co an pagmando ha iya ni Marcos nga iglusot ha badyet para ha 2025 an mga proyekto nga nagbabalor hin ₱100 kabilyon. Gintatantiya nga nagkubra dinhi hi Marcos hin ₱25 kabilyon nga kikbak. Sigon kan Co, nakagdeliber hiya hin masobra ₱50 kabilyon nga balor han kapareho nga kikbak kanda hadto anay *house speaker* Rep. Martin Romualdez ngan Marcos tikang 2022

Ha bulag nga bidyo, ginbuksas ni Co an pagmando ha iya han anak han presidente nga hi Rep. Sandro Marcos nga maglusot hin ₱50.9 kabilyon ha mga badyet tikang 2023 tubtub 2025 para ha kalugaringon niya nga kikbak. Ha usa pa nga bidyo, gindabi ni Co an asawa ni Marcos nga hi Liza Araneta-Marcos ha hiluagan nga ismagling han bugas, isda ngan utanon. Sering niya, ginpugngan ni Araneta-Marcos an imbestigasyon hadto ha Kongreso ha ismagling han bugas ngan sibuyas. Ini agud tahuban an papel han iya bugto nga hi Martin Araneta nga pasimuno han ismagling ngan manipulasyon han presyo han bugas ngan mga utanon tikang 2022.

"Allocable" komo bag-o nga pork barrel

Tikang 2022, ginpalusot han rehimen Marcos, kakunsabo an mga kongresista ngan senador, an *pork barrel* ha badyet ha gintawag hini nga mga "allocable" o "poyde ig-alutaga." Ha laktud, an *allocable* gin-



talaan nga balor nga mahingangadto ha kada kongresista nga pandistrito. Nakalakip ini ha National Expenditure Program han presidente ilarum han badyet han Department of Public Works and Highways (DPWH). Makukubra han usa nga kongresista an iya "allocable" pinaagi han pagsubmiter han mga suhestyon nga imprastruktura nga aaprubaran naman han presidente.

Ha imbestigasyon han Philippine Center for Investigative Journalism (PCIJ), ginawas nga hi Rep. Marcos an may pinakadako nga *allocable* (₱15.79 kabilyon) tikang 2023 tubtub 2025. Naikaduha ha iya an iya batâ nga hi Rep. Romualdez nga nakahakin hin ₱14.43 kabilyon. Naabot ha ₱1.2 katrilyon an kabug-usan nga *allocable* nga ginbabhin han 254 nga kongresista ha 14 nga rehiyon ha nakalabay nga tulo katuig.

Aada pa gihapon ha badyet para ha 2026 an mga *allocable*. Nag-alutaga an Kongreso para ha kalugaringon hini hin ₱400 kabilyon. Ginbaluyan han mga kongresista an hangyo nira nga mga proyekto nga *flood control* ngadto ha mga proyekto nga *farm-to-market road*, irigasyon, klasrum, mga pankalibsugan nga pasilidad, pabalay ngan pan-erport nga bilding. Ini agud malikyan nga matanggal ha badyet an ira pondo. Mayda liwat nakaalutaga nga ₱100 kabilyon nga *non-allocable* nga ginngaranan nga "free-for-all" (libre ha tanan) nga *pork barrel*. AB

Nagpapakusog an Kabataang Makabayan para ha gerra han katawhan

Komo pagsalin-urog ha ika-61 nga anibersaryo han Kabataang Makabayan (KM) hadton Nobyembre 30, naglansar hin pag-aram, asembleya, rali ngan iba pa nga aktibidad an mga tsapter hini. Paningkamot liwat ini han KM para parayhakon an sikreto nga kagiusan ha ranggo han kabatan-unan, agud pakusgon an pagpartisipar nira ha rebolusyunaryo nga kagiusan.

Ginpapakusog han KM an kalugaringon samtang nangunguna an mga kabatan-unan nga Pilipino ha hiluagan nga mga protesta kontra korapsyon ha bug-os nga nasud tikang pa Septyembre. Gin-aaghat han KM an mga kabatan-unan nga padayon nga pakusgon an ira guliat ngan pag-ato ha korapsyon ngan burukrata kapitalismo. Kadungan hini, ginkaklaro nira nga an tinuod nga pagbabag-o makakab-ot la han mga kabatan-unan ngan katawhan pinaagi han gerra han katawhan.

Adman an gerra han katawhan

Ha Manila, usa nga tsapter han KM ha usa nga kolehiyo an nagtirok agud talakayon an sinurat ni Ka Amado Guerrero nga An Mga Partikular nga Kinaiya han Aton Gerra han Katawhan. Ginpili nira an dokumento agud mapag-adman an gerra han katawhan nga ginlalansar han Bagong Hukbong Bayan (BHB), masantop an mga partikularidad hini ngan mahibaruhan an pamaagi han pagpapasulong hini tikang ha usa nga balitang ngadto ha usa pa.

"Napahilarum hini an pag-santop ko ha gerra han katawhan," pagpapasaro ni Ka Sharon, bag-o nga rekrut ha KM. "Ha luyo han klase nga gintikangan ko, mas ruruyagon ako yana nga pumartisipar ha masunod nga grupo han mga estudyante nga mapartisipar ha rebolusyunaryo nga integrasyon," sigon kan Ka Len.

Urupod liwat nga nagkita an mga membro han KM han dokumentaryo han Sine Proletaryo nga Buhay Komunista 2, nag-aram han rebolusyunaryo nga kanta nga Pagbati, ngan nagbasa han luwa nga An Gerilya Sugad han Parag-

siday ni Kasamang Jose Maria Si-son. Nagdiskusyon liwat an tsapter hiunong ha paghimo han rebolusyunaryo nga arte ngan an pagkakapareho hini ha arte han ginerilya nga pakiggerra.

Nagpahayag han optismo an upisyal han tsapter nga hi Ka Ces ha positibo nga igbubunga han ira nahilansar nga katitirok. "Hinaot matagan kita hini nga mga talakayan hin kapas nga labaw pa nga pandayon an aton mga kalugaringon ha natad han ideolohiya," sering niya. Mas ginkikinahanglan kuno ini han mga membro han KM atubangan han natikapintas nga pampulitika nga sitwasyon ilarum han rehimen Marcos.

Mga rali, asembleya ngan OP-OD han KM

Ha luyo han pasista nga panmuyopoy han rehimen, mapagdesisyon nga nahilansar han mga tsapter han KM an mga rali, asembleya ngan operasyon pinta-operasyon dikit (OP-OD) ha pira nga lugar. Mau-pay nira nga ginplano ini agud masiguro an katalwasan ha seguridad

han kada aktibidad.

Hadton Nobyembre 27 ngan 28, ngan Disyembre 5, naglansar hin rali an mga tsapter han KM ha Quezon City ngan Manila. Dara an bandera han KM, nanawagan hira ha mga kabatan-unan ngan katawhan Pilipino nga umapi ha BHB ngan ighalad an kusog, kabaltok ngan kapas ha pagpapasulong han gerra han katawhan.

Ha Metro Manila, tulo nga asembleya han KM an nahimo hadton Nobyembre. Samtang, nakaglansar hin OP-OD an mga tsapter han KM ha De La Salle University (DLSU)-Manila, DLS-College of St. Benilde, University of the Philippines (UP)-Manila ngan Polytechnic University of the Philippines ha Manila. Ginlansar liwat ini han KM ha UP Los Baños, ha Calamba City ha Laguna, ngan ha UP Cebu. Ha Canada, ginreport liwat han usa nga tsapter han KM nga ginkakaapihan han mga kabatan-unan nga Pilipino nga migrante ngan *diaspora* (binalhin tikang ha tuna nga gindak-an) an paglalansar han OP-OD.

Paluyu-luyo liwat an pamamahayag han mga tsapter han KM agud ig-salin-urog an anibersaryo hini. Ginsaludaran nira hi Ka Joma, an tagapangulo nga tagapagtukod han KM, para ha baul-karikuhan nga leksyon nga ginbilin niya para ha mga kabatan-unan ha pagpapasulong han rebolusyon Pilipino. Kalakip ha mga nagpagawas han pahayag an mga tsapter hini tikang ha rehiyon han Ilocos, Metro Manila, Negros Island, Panay, ngan ha Laguna, Cavite ngan Cebu.

"Ha aton pag-integreyt ha masa, maisugon naton nga pandayon an aton panindugan. Gintatawag kita nga umalinggawas na ha aton komportable nga kinabuhi ngan higwaos... labaw nga may pulos an sakripisyo agud tapuson an dunot nga sistema," pahayag han KM.



Edukasyon para ha komunista nga pagreremoldehan mga mangaraway

Ha hukbo han katawhan, importante an pag-aaram agud maremolde an mga mangaraway komo mga proletaryo nga rebolusyunaryo.

Ha Luntian, usa nga yunit han BHB ha Southern Tagalog, ginseseguro han komite han Partido ha sakob hini nga naiisa an balitang han teoritikal nga pagsantop ha Marxismo-Leninismo-Maoismo. Mahugot hini nga ginsusumpay an teorya ha kongkreto nga rebolusyunaryo nga praktika han yunit.

"An nagin ayat ha pagpapatuman han buruhaton edukasyon ha hukbo han katawhan an ginkakaatubang nga panmilitar nga sitwasyon," sering ni Ka Reymundo, kumander han yunit. Haros usa katuig nga dirudiretso an maniobra han Luntian tungod ha ginpapintas nga mga operasyon han Armed Forces of the Philippines. Nagdamo an gindeploy nga mga tropa hini ha prentengerilya. Ginpapintas liwat an paggamit hini han moderno nga mga armas ngan teknolohiya.

Pagpaparayhak han pampartido nga edukasyon

Nakatutok an kampanya nga edukasyon han Luntian ha utro nga pag-aram ha kasaysayan ngan mga bataan nga pag-analisar ngan linya han Partido. Pagsunod ini ha praktikal nga giya ha gintalaan han Partido nga kagiusan pagtutul-id. Tikang 2024, iginlansar ha yunit an regular ngan ispesyal nga mga kurso para rebyuhon an mga kasaypanan ngan kaluyahan, ngan pauswagon an mga kasama komo mga komunista. Kalakip ha mga kurso an Burukratismo, Kumandismo ngan Liberalismo, Igtul-id an mga Kasaypanan ngan Utro nga Tukuron an Partido, Komunista, Magin Abante nga Elemento han Proletaryado, Bataan Balaud han Partido ngan Programa para ha Demokratiko nga Rebolusyon han Katawhan.

Ginduduyugan an mga pag-aram han programa nga Kolektibo nga Pagbasa ngan Kolektibo nga Talakayan (KBKT) han mga aradman nga dokumento. Ini para ma-

pamilyarisa an mga estudyante ha ginuunod han mga kurso. Naaghat hini an mga kasama nga hadto waray hilig ha pagbabasa o talakayan. Kun nahilikatan, mismo an mga mangaraway an nagpapakiana: "Waray ba kita KBKT?"

Nagin inadlaw nga aktibidad liwat an Rebokabularyo. Iginpapakilala ngan iginpapaliwanag hini nga aktibidad an magbug-at nga termino, balaud, ngan signipikante nga personahe nga aada ha mga aradman nga topiko kada adlaw.

Kada nga naabot, agap nga gintatalakay an mga mensahe han Komite Sentral ngan Komite han Rehiyon ha mga anibersaryo han Partido ngan Hukbo. Gintatambungan ini han mga kadre ngan kaapi han Partido ha magkalain-lain nga lebel, ngan hasta han rebolusyunaryo nga masa.

Napuntirya ha mga kaluyahan

Mahugot nga iginsumpay ha kongkreto nga rebolusyunaryo nga praktika han mga kasama an mga pag-aram. Ginkukuha an mga pananglitan tikang ha aktwal nga eksperyensya han yunit ngan praktika han mga kasama.

Tungod dinhi, nagigin aragianan an mga pag-aram han unipikasyon han mga pag-ases ngan pagsusuma ha mga karukayaknon nga ginkakaatubang han yunit.

Naaaghat an mga kasama nga balikan an mga kalugaringon nga rebolusyunaryo nga praktika ha panahon han mga pag-aram ngan gamiton ini nga giya ha pagsusuma ha kalugaringon. Ha panahon han mga diskusyon, mas magaan nga nahiaatubang ha mga kasama an mga kasaypanan ngan kaluyahan han mga indibidwal.



"Damo kabeses nga naiigo ako ha pag-aram, ha mga angay himuon, ngan kun ano gud an karuyag sidngon han hul-os ngan bug-os nga pagse-serbe," sigon ha usa nga estudyante ha pag-ases han pag-aram nga naghisgot ha mga pamaagi tipaunan-o magpakaupay komo proletaryado.

Pag-ato ha empirismo

An pag-iisa han praktika ha teoritiko nga balitang han mga kasama yawe ha pag-ato ha empirismo. Giya ini ha mga pag-ases ngan pagsusuma. Katuyuanan hini nga magresulta han mas hitaas nga rebolusyunaryo nga praktika.

Ha mga pag-aram, gin-aaghat an mga kasama nga magin mas kritikal ha kalugaringon ngan ha iba nga kasama hiunong ha mga sayop nga estilo han pagtrabaho. Dako an bulig hini ha pag-ato han damo nga indibidwal ngan kolektibo nga kaluyahan han yunit. Yawe liwat ini ha pagresolba han mga sumpakiay nga nagtitikang ha magkalain-lain nga ideya, praktika ngan estilo.

"Mayda mga sumpakiay ha pagtutudlok han tama ngan sayop ha praktika, pag-eksister han empirismo ngan indibidwalismo, nga dirudiretso nga gin-aatuhan han yunit," sigon kan Ka Reymundo. Ha pagkita niya, mayda pag-uswag na hini ngs mga sumpakiay. Hinay-hinay na nga nagbabag-o an mga sayop nga kabatasanan ngan praktika han mga kasama.

"Mas mahugot na an yunit ha pagpapatuman han mga ginkaurasahan," sering niya.

Pasismo ha pusod han mga imperyalista nga nasud

Madinaugon nga iginlansar han National Democratic Front of the Philippines (NDFP) an ikalima nga internasyunal nga teoretikal nga kumperensya nga mayda tema nga Pasismo ha Ika-21 nga Siglo ha Pusod han mga Imperyalista nga Nasud. Ginhimo ini tikang Nobyembre 28 tubtub 29 ha Utrecht, The Netherlands.

Gintambungan an kumperensya han 125 nga indibidwal tikang ha 71 nga partido komunista ngan organisasyon masa. Baynte hini nga mga partido ngan grupo an nagsubmitter han mga kontribusyon nga gintalakay ha kumperensya. Iginhalad han NDFP an kumperensya ha hinumduman ni Ka Louie Jalandoni, proletaryo nga internayunalista ngan martir han rebolusyon Pilipino.

Naghisgot an 2 kaadlaw nga kumperensya ha teoretikal ngan istorikal nga pagsantop ha pasismo tikang ha mga sinurat nira Lenin, Stalin ngan Mao. Ginpadig-on hini an kahulugan han pasismo subay ha konsepto ni Georgi Dimitrov, usa nga komunista nga Bulgarian nga nagserbe nga pinuno han Communist International hadton dekada 1930. Sering ni Dimitrov, an makakalase nga kinaiya han pasismo aada ha porma han “dayag nga diktadura han pinakareaksyunaryo, pinakasobinista ngan pinaka-imperyalista nga elemento han kapitalismo ha pinansya.” Kinaiya han monopolyo kapitalismo nga ludlod ha krisis an pagin kontra-komunista, ultra-reaksyunaryo ngan pagin madarahug ha pagpuyopoy ha klase nga trabahador.

Gintalakay ha kumperensya an utro nga pagbuylo han pasismo durot han pankalibutan nga krisis han sistema nga kapitalista, labina kataliwan han krisis ha pinansya hadton 2008-2009. Gintudlok nira an mga pangilal-an han pasismo ngan pasisasyon ha mga imperyalista nga nasud nga nakatutok ha masunod: 1) pasisasyon han burgis nga estado; 2) paggamit han AI (artificial intelligence) ngan abante nga teknolohiya agud pugngan ngan mas tiyupion an klase nga trabahador; 3) paggrave han sobinismo ngan reaksyunaryo nga ideolohiya; ngan, 4) pag-ulpot han mga pasista nga kagiusan masa.

An pasisasyon han burgis nga estado an proseso diin nahuhukasan an liberal-burgis nga demokrasya ngan nabubutad an mas otoritaryan ngan mapanmuypoy nga mga pitad ngadto ha dayag nga paghahadi han teror.

Nagkamayda hin marayhak nga balyuay hiunong ha interaksyon han pasismo ha mga imperyalista nga nasud ngan ha mga neokolonya, diin batakan nga kinaiya han estado an pasismo. Ha mga bagakolonya syahan nga gin-aatentar ngan iginpapatuman han imperyalismo an mga eksperimento ha paggamit han terorismo han estado. Gin-gagamit hini an programa nga kontra-insurhensiya, panmilitar nga ayuda ngan manipulasyon ngan magdarahug nga panmuypoy ha mga katawhan.

Mayda partikular nga diskusyon ha nalalain nga eksperyensya han Ireland, nga ginkukunsidera an kalugaringon komo kapitalista nga bagakolonya, ngan Palestine, usa nga okupado nga nasud. Ha mga kagiusan nga pagtatalwas hini nga mga nasud, magkatig-ob an kontra-pasista ngan kontra-imperyalista nga pag-ato.

Gintudlok han kumperensya komo kadagmitan nga buruhaton han proletaryo an pagtutukod han “mapan-ato nga mga organisasyon” agud tugbangan an ginbug-os nga “mapan-ato nga mga organisasyon” han mga pasista nga kagiusan. Naghatag an mga kasama tikang ha mga imperyalista nga nasud han mga pananglitan han mga kongkreto nga kontra-pasista nga pag-ato.

Iginpresenta nira an mga leksyon tikang ha ira buruhaton masa, mga adbokasiya, pagdependa ha kalugaringon ngan pag-oorganisa ha sakob han mga unyon, partido, organisasyon ngan kagiusan. Gindudun-an nira an panginahanglan han



pagtutukod han hiluag nga kontra-pasista nga nagkakaurusa nga prente han mga trabahador ngan iba nga demokratiko nga sektor. Sering nira, an pagtutukod hini nga alyansa nanga-ngahulugan han pagsalikway han sektaryanismo ngan konserbatismo, samtang mabinantayon ha mga sosyal demokrata ngan iba pa nga oportunista nga elemento. Maaram hira nga integral an pamumuno han proletaryo ha nagkakaurusa nga prente ha pagsusumpay han mga panmasa nga pakigbisog ha pagpara han gamot han pasisasyon. Yawe ini nga pamumuno ha pagbungkag ha monopolyo kapitalismo ngan diktadura han burgesya.

Kumbinsido an mga pinartisipar tikang ha mga imperyalista nga nasud nga kinahanglan tukuron an madig-on nga partido han mga trabahador. Kinahanglan ipatuman an mga operasyon nga nakatago, kakumbinar an mga buruaton ha dayag, agud mag-iha ha atubangan han mga pasista nga pangatake ngan kab-uton an mga kadaugan para ha klase nga trabahador. Kinahanglan liwat mas pahiluagon an mga pagkakaurusa ha mga pakigbisog ha pusod han mga imperyalista nga nasud ngan mga bagakolonya.

Naghuman an kumperensya ha usa nga halipot nga kultural nga programa nga may tema nga “Tikang ha Palestine tubtub Pilipinas, rub-on an pan-gerra nga makina han US,” kadungan han pagsalin-urog han International Day of Solidarity with the People of Palestine.

27.3%↑

iginhitaas han presyo han mga pagkaon nga pan-*noche buena* tikang 2011, o 2.3% kada tuig

Ginkuhaan: *BusinessWorld Noche Buena Index*



**25
katuig na**

an **People's Liberation Guerilla Army**, armado nga pwersa han Communist Party of India-Maoist, hadton Disyembre 2.



₱500

badyet pan-*noche buena* nga sadang kuno para ha lima katawo nga pamilya, sigon ha Department of Trade and Industry.

Nahiagum ini hin grabe nga pagsukna, ngan gintawag han mga trabahador ngan kblas nga "tukal" ngan "makairinsulto."

17 COLD STORAGE FACILITY
(mataghum nga istakan han mga produkto agud diri madunot)

nga igintindog hadton 2022 nga nabalor han ₱20 kamilyon kada usa, diri mahigamitan tungod han palpak nga disenyo ngan konstruksyon



₱9.8 KABILYON

pan-ayuda nga pondo ilarum han Assistance to Nationals han Department of Foreign Affairs ngan ₱1.2 kabilyon nga ayuda han Agarang Kalinga at Saklolo para sa mga OFW na Nangangailangan han Department of Migrant Workers ang iginpapareho ha mga *flood control* "ghost project" tungod kay diri ini natatagamtaman han mga migrante nga Pilipino.



₱17.56 KATRILYON

na an **utang han Pilipinas** hadton katapusan han Oktubre 2025, mas hitaas hin 10% tikang ₱16.02 katrilyon hadton Oktubre 2024.

**120.5%
BED OCCUPANCY
RATE**

o ihap han pasyente kada 100 nga kama ha mga ospital ha Pilipinas. Bulnerable an mga mayda sakit ngan trabahador pankalibsugan tungod ha pagsusuruot ha mga ospital, tigaman nga aada ha krisis an sistema pankalibsugan.

27 WEBSITE

han mga **alternatibo nga midya**, panmasa nga organisasyon ngan iba pa an iginmando han korte nga *ig-unblock* o himuon nga *accessible* utro ha publiko;

Gin-abuyunan han korte an petisyon han Bulatlat, usa ha mga iginpaserra, nga an ginhimo nga "pag-block" pagsesensor ngan talapas ha kalibrihan ha pagyayakan, pagpapahayag ngan pamamahayag.

4 nga sundalo han AFP, napatay ha mga engkwentro ha BHB

NAPATAY HAN Bagong Hukbong Bayan (BHB) an upat nga sundalo han Armed Forces of the Philippines (AFP) ha magkabulag nga engkwentro ha Samar ngan Occidental Mindoro.

Ha patikang nga report, diri mamenos ha duha nga sundalo han 8th ID an napatay ha armado nga aksyon han BHB ha Barangay Babaclayon, San Jose de Buan, Samar hadton Disyembre 3. Ha Occidental Mindoro, duha nga sundalo han 76th IB an napatay ha engkwentro ha Sityo Balite, Barangay Lumangbayan, Abra de Ilog hadton Nobyembre 26. Damo nga iba pa an nahireport nga nasamaran ha mga sundalo.

Samtang, hadton Oktubre 28 tulo nga tropa han 62nd IB an napatay ha engkwentro ha BHB ha Barangay Quintin Remo, Moises Padilla, Negros Occidental. Ha kaperdihan hini, nagpauran han bala an 62nd IB ngan napatay an usa nga 6-anyos nga bata.

Militar nga paghahadi ha isla han Samar ngan Kalinga

Ha Samar, tikang Nobyembre 22 militarizado an mga barangay han Gereganan, Marcos, San Miguel ngan kaamyaw nga mga komunidad ha Gandara. Bunga hini, masobra 100 nga residente han barangay Marcos ngan San Miguel an napiritan nga mag-e-bakwet ha ira mga balay. Nag-imponer han hamlet an militar ngan ginpugnan an pagtukad ngan pagpakabuhi.

Ha Northern Samar, naglansar han *aerial bombing* ngan pangistraping an 8th ID ha Barangay Nipa, Palapag hadton alas-2 han kaagahon han Nobyembre 29. Nagdurot ini hin grabe nga kahadlok ha mga residente.

Ha Kalinga, waray hunong an pankombat nga operasyon han 103rd IB ha mga barangay ha Pinukpuk kasunod han mga engkwentro hini ha hukbo han katawhan hadton Nobyembre 21. Nagkakampo an mga sundalo ha mga sentro nga komunidad nga nakakaapekto ha panginabuhi ngan seguridad han katawhan. Hadton Nobyembre 30, ginransak han mga pulis an balay han tag-dependa han tawhanon nga katungod nga hi Elma Awingan-Tuazon ha Barangay Cawagayan, Pinukpuk. Gin-atake han 20 nga pulis an iya balay ha akusasyon nga nag-aataman han samaran nga mangaraway han BHB.

Ha iba nga parte han nasud, nahirekord an mga kaso han pangaresto, panunog, ngan pan-gigipit han militar. Ha Navotas City, gin-aresto han mga pulis an kontra-demolisyon nga lider-kababayin-an nga hi Jane Alfabeto hadton Nobyembre 27.

Ha Negros Occidental, ginsunog han 15th IB an balay han parag-uma nga hi Carmelita Ulgasan ha Barangay Linaon hadton Nobyembre 28 ha akusasyon nga tagsuporta han hukbo han katawhan. Samtang, padayon an pan-gigipit ni Warden Jsupt. Crisylrel Awe ha mga priso pulitikal ngan iba pa nga priso ha prisuhan ha Bago City. Nagprotesta an mga priso ngan pamilya agud atuhan ini hadton Disyembre 3.

Ha Masbate, ginkawat han 2nd IB an walo nga karabaw ngan baka han mga parag-uma ha Lupaing Triple A ha Cawayan, Masbate hadton Nobyembre 27. Antes hini, ginkawat liwat han mga sundalo an inataman nga hayop han mga parag-uma ha barangay ha bungto han Mobo, Milagros ngan Uson.



Israel ngan US, ginsentensyahan nga sala-an ha krimen han henosidyo ngan *ecocide*. Nahuman an International People's Tribunal on Palestine nga ginhimo hadton Nobyembre 22-23 ha Spain ha sentensya nga mayda sala an Zionista nga estado han Israel ngan mga kakunsabo hini nga gubyerno han US, UK ngan Germany, France ngan iba pa ha henosidyo ngan *ecocide* nga krimen.

Hadton Nobyembre 29, nagkamayda hin katitirok an mga grupo nga maka-Palestine ha pangunguna han Philippines-Palestine Friendship Association agud talakayon ngan padig-unon an desisyon han IPT. Ginsundan ini han halipot nga paggios ha atubangan han University of the Philippines-Manila diin ginhimo an katitirok.

2 kaadlaw nga kalampagan han minoriya nga Cordilleran ha NCR. Igindeklara han mga minoriya tikang ha Cordillera nga madi-naugon an 2 kaadlaw nga kalampagan ha nasyunal nga syudad nga iginlansar nira hadton Nobyembre 25 ngan 26. Katuyuanan han kalampagan an ipahibaro ha mga ahensya ngan departamento han gubyerno, sugad liwat ha Kongreso, an mga araba han mga minoriya tikang ha rehiyon. Ginpangunahan an kalampagan han Cordillera People's Alliance.

Plano nga demolisyon ha Taytay, ginkundendar. Nagprotesta ha atubangan han munisipyo han Taytay, Rizal an mga residente han Sityo Sapang Gody ngan Siwang han Barangay San Juan hadton Nobyembre 26 agud manawagan hin dayalogo ha lokal nga gubyrno ngan kundenaron an hulga nga demolisyon ha ira lugar. Pirit nga gin-aangkon han Sta. Lucia Corporation ngan ni Kristina Robles an ira gin-uukyan.

Kabatan-unan, natipa ha Davao Bus Project. Nagprotesta an Anakbayan-SMR hadton Nobyembre 24 ha Davao City, agud ipanawagan an pagpapabasura ha peke nga modernisasyon ngan kontra-katawhan han Davao Bus Project (DBP) han lokal nga konseho han Davao City. Iginpipirit an proyekto han Asian Development Bank, kakunsabo an pamilya Duterte, ha syudad. Katuyuanan han proyekto nga lusawon an nadalagan nga sistema han transportasyon ha Davao nga ginbubug-os han mga moderno ngan tradisyunal nga dyip, traysikol ngan bus. Ginpopondohan an DBP han P54 kabilyon nga utang tikang ha ADB.

Pagawson an mga priso pulitikal, pagawson an mga alibangbang han kagiusan nga mapagtalwas

Kada tuig, kada Nobyembre 25, ginhahandum an International Day for the Elimination of Violence Against Women (IDEVAW). Pagkila-la ini ha pagkamartir han babaye nga magburugto nga Mirabal nga ginpatay han estado han Dominican Republic hadton 1960. Iginmando hadto han diktador nga hi Rafael Trujillo an pagpatay ha magburugto nga hira Patria, Minerva ngan Maria Theresa tungod ha ira pag-ato.

An mga magburugto, ginkilala komo mga alibangbang ha ira nasud, an kaupod ha nagtukod han kontra-diktadura nga kagiusan nga "14th of June (Ika-14 han Hunyo). Nagin simbolo hira han kontra-diktadura nga pakigbisog han Dominican Republic ngan magin ha iba nga nasud. An ira kamatayon an usa ha nagin mitsa ha pagpapabagsak han diktadura nga Trujillo, unom kabulan kataliwan an pagpatay.

Sugad han magburugto nga Mirabal, yukut-yukot nga kababayin-an ha Pilipinas an gin-gagamit an ira kabaltok, kusog ngan kinabuhi agud atuhan an pasismo han estado, ipakigbisog an katungod han kababayin-an ngan bag-uhon an katingban. Sugad ha mga Mirabal, kamadarahug liwat an baton ha ira han estado. Biktima hira han pangaresto, pagsikmit, detensyon, sekswal nga pangabuso, pwersahay nga pagpawara ngan panmatay.

Kamadarahug han diri makatadungan nga pangaresto ngan detensyon

Kaupod ha biktima han kamadarahug han estado an magbugto nga Banjawan. Gin-aresto hi Fatima, organisador han Gabriela Youth, han 85th IB hadton Agosto 2, 2024 ha Sta. Elena, Camarines Sur. Kataliwan han pira kabulan, gin-aresto hi Pauline han 59th IB hadton Abril 26. Ngaduha hira iginpailarum ha pisikal ngan mental nga tortyur han militar.

Hira Fatima ngan Pauline pira la ha gatus-gatos nga kababayin-an nga biktima han pag-aresto ngan pagsikmit ha ilarum han rehimen US-Marcos.

Basar ha lista han grupo nga Karapatan, mayda 696 nga priso pulitikal ha nasud diin 164 an gin-a-

resto ilarum han rehimen Marcos. Ha mga priso, 146 dinhi kababayin-an. Nakaglista naman an Ang Bayan han 63 nga kaso han pangaresto han kababayin-an, tulo hini mayda kaupod nga bata o puya han gin-aresto, ngan lima ha ira burod. Kadaman ha mga gin-aresto tikang ha Negros (14), sunod ha Bikol (10) ngan Southern Tagalog (9).

Target han estado an mga kabatan-unan nga kababayin-an nga ginpili nga mag-organisa ngan magserbe ha ranggo han mga trabahador, paraguma, parupangisda ngan minoriya. Kaupod dinhi hira Amanda Echanis, Michelle Campos, Emelyn Acevido, Charisse Bañez, Louvaine Erika Espina, Sofia Almonte ngan Andy Magno. Iligal hira nga gin-aresto, ginsikmit ngan iginpriso ha kampo han militar ngan iginpailarum ha mental ngan/o pisikal nga tortyur antes iginpasa ha kapulisan agud igpriso. Ginsalawdan hira han mga kaso sugad han *illegal possession of fire arms and explosives, homicide, murder*, ngan pagtalapas ha Anti-terrorism Act.

Target an bulnerable nga kababayin-an

Tuyo nga gintatarget liwat an mga burod o nanganak pala nga gindududahan nira nga Pula nga mangaraway o asawa han Pula nga mangaraway. Bisan an puya diri talwas ha pagsikmit han mga militar.

Hadton Enero 13, 2021, dapit alas-2 han kaagahon, ginsulod han mga sundalo tikang ha 79th IB an balay nira Edwin ngan Marlyn Madin ha Barangay San Fernando, Talisay City, Negros Occidental ngan gin-



sikmit an hadto anay 2-kabulan nga puya nga hi Baby Marx Cairo Salino. Gin-gamit nga hostage han AFP an puya agud pwersahon an iya mga kag-anak nga membro han Bagong Hukbong Bayan nga mag-surrender. Hasta yana, iginhihikaw han DSWD an kustodiya ni Baby Marx ha iya lolo ngan lola, subay ha mando han AFP.

Ha pagpintas han pan-ekonomiya ngan pampulitika nga krisis ha nasud, mas natikagrabe an kamadarahug nga nahiaaguman han kababayin-an. Ngan hini nga pagpintas, piho nga mas magdadamo pa an kababayin-an nga matindog agud tapuson an pyudal-patriyarkal ngan burgis-dekadente nga sistema.

Sigon ha Makabayang Kilusan ng Bagong Kababaihan, 65 katug kahuman patayon an magburugto nga Mirabal, dugang pa nga nagigin mas mahinungdanon ngan importante an rebolusyon. Ha armado nga pag-ato gud la nga may sosyalista nga perspektiba an nagpapabilin nga mapagdesisyon nga dalan agud tapuson an kamadarahug nga nakabasar ha tawoa tubtub ha hul-os nga katalwasan han kababayin-an.

AB